

Èkwo-ozì Ke Mbù, Pòlu Deru Nù Timoti

¹ Èkwo-ozì-a bẹ shi l'èka mbedua, bụ Pòlu; mbù mube onye-ishi-ozì Kéreshi Jizosu. Ọo Chileke ono, bụ onye l'adzoje anyi; yẹ Kéreshi Jizosu ono, bụ onye anyi ele ọnya iya-a; bẹ ziru mu gẹ mu buru onye-ishi-ozì ono. ² Onye mu ede èkwo-a anụ bụ gùbedua, bụ Timoti; onye bụwaa ọkpobe nwa mu; l'ekweta ono anyi kwetarụ ono. Gẹ Chileke, bụ Nna; mẹ Nnajjuphu, bụ Kéreshi Jizosu; meeru ngu eze-iphe-oma; phuaru ngu obu-imemini; mekwaphọ g'ẹhu dụ ngu guu.

Alọ ndu ẹjo-nzi ẹka lẹ nchị

³ Sụ-a; teke ono, mu eje Masedoniya bẹ mu sụkwaru ngu: jiko g'ị nọdukwapho lẹ Efesosu k'ọphu ịi-harụ alọ ndu ẹjo-nzi ẹka lẹ nchị g'ẹphe b'e ezihẹkwa iphe, abudu ọkpobe-opfu.

⁴ Ọphu ẹphe anọdujeshi akọ-phe mkpọkoro akọ-iphè ndu Jiu. Ọphu ẹphe agushijeshi ndzepfu ndzepfu ẹpha ndiche; ẹpha ọphu ta abvujedu abvubvu. Ẹgube iphe ono bụepho ịgologoli bẹ ọokpa-lije. O to yejeduru nemadzụ ẹka g'o mee iphe, Chileke tuberu g'o mee; mbù iphe ono, anyi shi l'ozì-oma, anyi kwetarụ ono maru.

⁵ Iphe, kparụ iphe, mu gude nmaaru ngu ọkwa-a bukwa gẹ ndu kẹ Kéreshi egude obu iphóró yee nwibe phẹ obu; gude egomunggo phẹ maru iphe, gbaru phẹ l'ememe; kweta kẹ Chileke ọkpobe ekweta. ⁶ Ọ dọru ndu hawaru shiswee ọkpobe

uzo ono; woru iphu chee ichephu; shiwaro nno wata epfuphe mkpokoro opfu. ⁷ Ndu ono be oogu egu aburu ndu ezi ekemu Chileke l'ebe abu l'opfu, ephe epfu doru phe enya; ophu iphe ono, ephe epfushi opfu iya ike ono edokwaru phe pho enya.

⁸ Anyibedua g'anyi hakota be tukokwaru machaaru l'ekemu Chileke be du ree me a -nodu emekwa iya g'o gbaru g'e meje iya. ⁹ Ole ophu doru enya bu l'o to bukwa ndu pfuberekoto be a tu-doru ekemu ono. O kwa ndu adarwu ekemu adarwu; me ndu bu o-kari-eka; tuaru iya ndu anoduje akpo Chileke ebo l'afu; me ndu iphe-aji; tuaru iya ndu aduduru Chileke nsu; me ndu ono adudu iphe, bu ke Chileke me nanu duru ophu ephe eyeru nsu ono; bya atuaru iya ndu egbuje nna phe me ne phe; bya atuaru iya ndu mgbugbumadzu l'opfu. ¹⁰ A turu iya doberu ndu arwuje urwuali; me unwoke ejepfuje unwoke ibe phe; bya atua ya doberu ndu apa nemadzu l'oshi. A turu iya doberu ndu adzujе uka me ndu akpapyabeje iphe, ephe meru ria nte; bya atua ya doberu iphe, bukpoо ndu eme iphe, abudu okpobe-opfu ono, e ziru unu ono. ¹¹ Okpobe-opfu ono, e ziru unu ono be shikwa l'ozi-oma ono, Jizosu Kereshi yeru mu l'eka ono. Ozi-oma ono bukwanuru ozi-oma k'odu-biribiri Chileke ono, bu Chileke dukota ree bya edzukota oke l'ime onwiya ono.

Polu etu Chileke epha

¹² Mu etu Nnajiuphu, bu Kereshi Jizosu epha. Oo ya be bu onye meru; mu du ike eje ozi-a, mu

eje-a. Mu etu iya epha; kele o lewaru enya huma le mu gbaru k'ophu ya e-gude ire mu eka; bya ahota mu ge mu jeeru iya ozi ono. ¹³ A makwaru-a le mu shi anoduje epfutoshi Jizosu Kereshi le mbulembu; shi anoduje achi nta iya; shikwapho anoduje eme iya iphe-iphere. Ole Chileke be phulekwaru mu-a obu-imemini; kele iphemiphe ono, mu shi eme ono be mu shi eme l'amagama. Mu te eshidu kwetawaa teke ono l'oo Jizosu bu Nnajiuphu. ¹⁴ Tobudu iya bu; Nnajiuphu anyi ono, bu Jizosu Kereshi ono bya aphuaru mu obu-imemini ophu nyiberu g'aatu onu iya. O mee mu: mu bya ekweta l'oo yebedua bu Nnajiuphu; mekwaa mu pho: mu bya eyee ndu ozo obu. Ono buru iphe, oomejeru iphe, bukpo ndu epe l'iya tugbaru buru nanu. ¹⁵ Owa-a bu opfu, gbaru g'e gude iya eka; teme o du ree g'onnyemonye gbobe eka nata iya okpobe anata. Le Kereshi Jizosu byaru le mgboko-a ge ya bya adzo ndu eme iphe-eji. O buru mbedua be eme iphe-eji obu shi wukoru. ¹⁶ Noo g'o gude Jizosu Kereshi phuaru mbedua obu-imemini bya emee g'o buru l'ehu mu be ya e-shi goshi ndu ozo ge ya atabeje nshi shii. Oo ya bu le Jizosu Kereshi be gude eh mu egoshi ndu ozo le ya a-gbenu dzoo phe; nu phe ndzu ojeje; o betakporu iphe-eji phe du idagha; me o -buru l'ephe kwetar nkiya. ¹⁷ Su-a; gube Chileke ono, bu eze ojeje; bya aburu onye ta anwuhujedu anwuhu; bya aburu onye ata humajedu l'enya; bya aburu ngu bu Chileke, maru iphe kpoloko; g'a kwabe ngu ubvu; jaa ngu ajaja; jasu le tuutuutuu le mimiimii. Nokwa g'o du bu ono-o.

¹⁸ Sụ-a; nwa mu Timoti; mu anma ọkwa-a eye ngu l'ẹka. Gẹ mu gude iya nyataru ngu iphe, ondu mpfuchiru Chileke pfuru l'opfu ẹhu ngu ono; k'ophu ii-gude iya l'wua ọgu ẹhu Chileke ono. ¹⁹ Kwekpọekwapho kẹ Kéreshi; g'iphemiphe, iime bujeekwarupho iphe, obu ngu marwetaru l'ọo iphe, gbaru iya l'ememe. O nwekwaru ndu machacharu-a iphe, gbaru pẹ l'ememe, obu pẹ sụru g'ẹphe mee; ophu ẹphe emejedu iya. O bu ru iphe ono meru g'o gude ekwekwe, ẹphe kweru kẹ Kéreshi rikashi hu erikashi hu g'ugbo-mini, jeru asua onwiya l'akpaa. ²⁰ Ndu haru yiru lẹ ndu ono bẹ bu Hayimeniyosu waa Alẹguzanda. Ndu ono bẹ mu woakwaru ye Nsetanu l'ẹka g'ọ nua pẹ aphu k'ophu ẹphe a-nwutakwanu l'ọ tọ dudu ree mbu eputoshi Chileke.

2

Abaru Chileke ẹja lẹ Chiochi

¹ Iphe mbu, mu epfu epfushi ike bu; g'e pfujeru nu Chileke su iya g'ọ gbaaru ndiphe mkpu; l'o meeru pẹ iphe, mkpa iya duru pẹ. La rwojekwa iya pho arwo wo ẹhu onyemonye; ekelejekwa iya pho ekele. ² G'e pfujeru nu Chileke l'iswi ẹhu ndu eze; mewaro iphe, bukpo ndu bu ndu-ishi. Oo ya bu k'ophu nchi a-du anyi doo; anyi eburu l'ẹhu-guu; anyi a-ndu anuru Chileke opfu; mekwapho k'ophu anyi a-nduje eme umere, gbaru anyi l'iphemiphe, anyi eme. ³ Sụ-a; nokwa iphe, du ree bu onoya. Teme o bukwaru iya pho bu iphe, du Chileke ree; mbu

Chileke ono, bu Onye-Ndzoṭa anyi ono. ⁴ O du Chileke l'uche ge ya tuko iphe, bukpo nemadzu l'ophu dzoo. O dukwa iya pho g'a su l'iphe, bu nemadzu g'a ha byakotaru bya amaru iphe ono, bu okpobe-opfu onoya. ⁵ Noo kele o Chileke lanu be du nu kpoloko; o bukwarupho onye lanu kpoloko be bu onye apfujeru le mgbaka Chileke yee nemadzu. Onye ono bu iya bu Kereshi Jizosu, bukwapho nemadzu l'onwiya. ⁶ Onye woru onwiya nu g'e gude ndzu iya gbata oha l'ophu; agba ekebe iya l'orwuberu iya. ⁷ Noo g'o gude o hota mu mee mu ge mu buru onye-ozima; buru onye-ishi-ozima; k'ophu mu egude ozima ono je araa arara l'al ndu abudu ndu Jiu; k'ophu ephe ekwetakota okpobe-opfu ono. Mbu; o kwa okpobe-opfu be mu no l'eka Kereshi epfu ono. Mu ta adzuka uka.

⁸ Su-a; iphe, du mu ree bu g'unwoke pfujekwa nu Chileke l'iphe, bukpo ekameka. Gephe chilije aka phe gude obu iphoro epfu anu Chileke. G'ehu te eghujekwa phe egu; ophu ephe abojekwa obu ebo m'ephe nodu epfu anu Chileke.

⁹ A bya abya l'unwanyi; iphe, du mu ree bu ge nwanyi rije oriri maru egube uwe, ooye l'ehu. Ge nwanyi yeje uwe gbaru iya nu. G'iphe, ephe egudeje eme omemma buru iphe, egoshi l'ephe doberu onwophe oru bya esedeje onwophe. G'o to bukwa eme egbushi g'o buru iya bu aka enya a-nodu eje. G'unwanyi te egudejekwa mkpola-ododo yee aka eme omemma. Ophu ephe eyejekwa uwe erenuka ire gude akwa onwophe ngwa. ¹⁰ Iphe, unwanyi emejekhia bu

g'ephe meje iphe-oma, bukwanu iya bu iphe, gbaru unwanyi, suru le Chileke duru phe le nsò l'ememe. ¹¹ G'unwanyi wozejekwa onwophe ali okpobe ewoze; noduje nwa nggujungguji; nwuje iphe, eezi phe. ¹² Mu te ekwekwa g'unwanyi zije iphe. Ophu mu ekwedu g'o duru nwanyi, anodu aturu unwoke iphe, ephe a-nodu eme. G'unwanyi jipyajeepho onwophe nwadoo. ¹³ L'o kwa Adamu be Chileke vuru uzo mee teme o meje Ivu. ¹⁴ Ophu o bukwa Adamu be Nsetanu ghoru ugho; o kwa nwanyi be o ghoru iya; mee ya o mebyia ekemu, Chileke turu. ¹⁵ Ole iphe, Chileke l'e-gude dzoo nwanyi bu anwushi unwu; me o bukpowaru l'o no-shiru ike l'ekwekwe, o kweru ke Kereshi; bya eyee ndu ozo obu; buru onye ke Chileke okpobe abubu; bya edobe onwiya oru.

3

Ndu-ishi ndu Chiochi

¹ Iphe ono, e pfuru ono bukwa okpobe-opfu: "O-buru l'o duru onye enya du g'o buru onye-ishi Chiochi; onye ono bukwa okpobe iphe be agu iya nu." ² Onye-ishi Chiochi bufutajekwa onye uta adudu le ndzu iya; onye alu nwanyi lanu; bukwarupho onye esedeje onwiya; buru onye nweru uche; onye umere iya du ree; onye ooheje ihee akwa ebyaa; l'o bukwarupho onye aduje ike ezi ndu ozo iphe. ³ G'onye ono ta abukwaru onye anguje mee g'o tsu iya atsutsu; ophu onye ono abukwaru onye eme ehuka. G'o to bukwaru onye eme ughoro. G'onye ono buchiaru onye

atajeru iphe nshi; onye ta aswojedu uswo; l'ọ buru onye te eyeduru ẹnya l'okpoga. ⁴ G'onye ono bukwaru onye duru ike leta ibe iya ẹnya ree; onye unwegirima ibe iya anuru opfu bya akwabe ubvu. ⁵ Le teke o bu le nemadzu ta adudu ike buru onye-ishi l'ibe iya; ?denuhunu g'onye obu e-me du ike buru onye-ishi Chiochi ke Chileke? ⁶ G'onye ono ta abukwaru onye teke adudu iphe, o mawaru le ke Chileke; k'ophu onye obu ata watadu etse etsetse; eshi egube ono Chileke anmaa ya ikpe g'o nmaru Obutuswe. ⁷ Onye ono aburu onye ndu abudu ndu Chiochi epfu l'oome ree; oo ya bu g'o to dukwanu onye a-su l'o phuu iphe, onye-ishi Chiochi meru; a - nonyaa Obutuswe gude egube iphe ono nmata onye-ishi onoya l'onya.

Ndu ejeru Chiochi ozi

⁸ Nokwapho ge ndu ejeru Chiochi ozi bufutaje ndu eeyeru ubvu. Epe taa buduru ndu ntuphuire; ophu epe abuduru ndu ngunukaru mee; ophu epe abuduru ndu anoduje achọ urwu l'uzo adudu ree. ⁹ Epe e-gude obu phe g'o ha gudepyabe okpobe-opfu ono, Chileke goshiru anyi ono; g'obu ta awajekwa phe mini. ¹⁰ G'e vujeadakwaru uzo hụadaa ndu obu ama; teke a huchaaru phe ama; ophu o dudu eka onu aboru phe ebo; temanu e yewa phe ro g'ephe jejeru Chiochi ozi. ¹¹ Nokwapho ge unyomu phe bufutaje ndu eeyeru ubvu; ndu ta asudu asulasu; ndu aduje ike sede onwophe; epe aburu ndu e gude ire phe eka l'iphemiphe. ¹² G'onye ejeru Chiochi ozi bukwaru nwanyi lanu

kpoloko bẹ ọo-nọdu alu. L'ọ buru onye duru ike eleta unwu iya enya rengurengu; eletakwapho ibe iya enya ree. ¹³ Noo le teke o bu le ndu ejeru Chiochi ozi bẹ ejerwe iya ejerwe bẹ o gbakwaru ke g'a kwabeje phe ubvu, ha shii. Epeh adujekwanu ike shihu obu ike asa iphe ono, anyi kweru ono kpaa kpaa; mbu iphe ono, anyi no Kereshi l'eka kweta ono.

Iphe, Chileke shi domia edomi

¹⁴ Ekwo-ozia bẹ mu ede anu ngu; ole o to dukwa ge mu ano-beru nta-a mu abyapfuta ngu; ¹⁵ k'ophu bu; mu -nọahaa odu abyabya l'ii-maru g'i-gudeje eme umere l'ulo Chileke ono, bu iya bu Chiochi ke Chileke ophu dzu ndzu; bya aburu itso yee okpa-ulo k'okpobe-opfu onoya. ¹⁶ A tukoru kwetakota l'okpobe-opfu ono, Chileke shi domia edomi onoya pfubekpooru paa eka mebyi apaa. Chileke goshiru iya anyi; anyi kwetakwa iya pho. Okpobe-opfu obu bẹ pfuru su:

Jizosu bẹ byaru le mgboko-a

bya aburu nemadzu.

Unme Chileke goshi

l'ọ bu

onye pfuberekoto.

Unwu-ojozi-imigwe

gudekwapho enya

phe huma iya.

E pfukotaru ohamoha,

no le mgboko opfu

ehu iya.

Ndiphe kweta nkiya;

Chileke bya ekuta iya

kuba l'imigwe
je akwabẹ iya ùbvù,
ka l'ùbvù.

4

Ndu ejo-nzi

¹ Unme Chileke bẹ epfuru iya anyi enwu iya anyi enwunwu lẹ nchị sù l'e-mechaa nweru ndu e-dochi ekweta onoya wata anga nchị l'iphe, ndu ọbvù ałọ-kpurukpuru epfu; wata etso iphe, ọbvù ono ezi. ² Gude opfu tuko-l'ẹhu-atuko-l'obu adzushi ụka; ndu e gudewaa ọku mkpụrukpu-ígwè hụchishia egomunggo. ³ Ẹphe anọduje ezi g'a ta alujeshi nwanyi; ọphu erijeshi ẹgube nri ọwa-a ọzo ọphuu; mbụ nri, Chileke meru gẹ ndu kweru nkiya bya amaru ọkpobe-opfu ono riye eriri. ⁴ Iphemiphe, bukpo iphe, Chileke meru bẹ dukotakwa ree. O tọ dukwa ọphu gbaru kẹ g'a jikaje iya mẹ e kelewaa Chileke ekele iya. ⁵ Noo kẹle opfu Chileke yẹe epfupfu, e pfuru nọ Chileke onoya bẹ mewaru iphe onoya ọ dọ nsọ l'iphu Chileke.

Onye ejeru Kéreshi Jizọsu ozi ọkpobe ejeje

⁶ O -buru l'i woru iphe, bụ ọkwa-a, a nmakotaru ngu-a g'ọ ha nmakotaru iphe, bụ unwunna g'ẹphe hakota bẹ bukwa iya bụ l'i bụ onye ejeru Kéreshi ozi eje iya ọkpobe ejeje. Oo ya bụ l'iigoshi l'ọo opfu Chileke ono, i kwetaru mẹ ọkpobe iphe ono, e ziru ngu ono, i shiepho k'eshinu ono tsota ono bẹ bụ nri, i gude azụ onwongu. ⁷ Ta angabejekwa nchị lẹ mkpọkoro akọ-iphè unwanyi ọgerenya, bụ akọ adudu iphe,

bụ ọkpobe-opfu, dị iya nụ ililekpoo. Iphe, ii-mechia bụ g'ị hùje onwongu ahùhù; g'iigude nno nọdu ndzụ, dị Chileke ree. ⁸ Kẹle ahùhù ọphu aahù ogwẹhu bẹ urwu, dị iya nụ hakwa nwan-shji; obenu l'ọphu urwu gbaru mgburugburu bụ lẹ nemadzụ anuru Chileke opfu. Noo kẹle Chileke kweru ukwe lẹ ndu eme nno bẹ ya emeru eze-iphe-oma lẹ ndzụ ọphu ẹphe nọ nta-a; bya emeeru pẹ iya lẹ ndzụ ọphu ẹphe anọdu l'oduliphu. ⁹ Opfu-a bẹ bụ opfu, e gude ẹka; mbụ opfu gbaru g'onyemonye machia ẹka labọ nata iya. ¹⁰ Oo iphe ono meru g'o gude anyi nọdu anọduje eseshi akanya iya ike; eje iphe-ẹhuka. Kẹle anyi kpọru obu yeru Chileke, nọ ndzụ; mbụ Chileke ọphu bụ Onye-Ndzọta ndiphe l'ọphu; kekeleke kẹ ndu kweru nkiya.

¹¹ Pfuaru pẹ iphe onoya pfushiaru pẹ iya ike; l'iizikwaa pẹ iya phọ ezizi. ¹² Te ekwekwa g'ọ duru onye a-nọdu eko ngu ọkpa l'ishi opfu l'ị bụ nwata. Iphe, ii-mechia bụ g'ị buru ipheleta-mee l'opfu onu; mẹ abọ ụja; mẹ lẹ nyemobu; mẹ l'ekweta kẹ Chileke; mẹ l'aduebe ree. ¹³ Iphe, iinodukpoephe emeje jasụ mu abya bukwa: g'ị gujeru Chiochi ẹkwo-opfu Chileke; l'i meje g'obu shihu pẹ ike; l'ị tọwashijekwaru pẹ phọ opfu Chileke g'o doo pẹ ọnya. ¹⁴ Ta akwaswekwaru ọnya l'iphe-oma ono, Chileke meru ngu teke ono, ndu mpfuchiru Chileke gude ike, Chileke nuru pẹ pfuchiaru iya ono; mbụ teke ono, ndu e meru ọgerenya Chiochi byaberu ngu ẹka l'ishi ono. ¹⁵ Kebekpọephe ẹhu meje iphe ono; phube iphu me iya ree; k'ọphu

onyemonye l'a-huma g'i gude ejekpọlepho l'iphu l'iphu. ¹⁶ Kwabẹekwarupho umere ngu ẹnya; l'ị kwabẹkwarupho ẹnya l'iphe ono, iizi ndu ọzo ono. Mejeekwapho iphemiphe ono; kele i -nọdu emewaa egube ono; l'ị dzọo onwongu ndzụ; dzọo ndu anọduje anụ iphe, iipfu.

5

¹ Ta abajekwaru nwoke, ka ngu aburu ọgerenya mba; tojechikwa nwẹhu pfuru yeru iya g'ọ bu iya bu nna ngu. L'i mejeru unwoke, ka aburu nwata gẹ gu l'ẹphe bu unwune. ² Unwanyi ka aburu ọgerenya be ii-meje g'ẹphe bu ne ngu. L'iimejekwarupho unwanyi, ka ngu aburu nwata gẹ gu l'ẹphe bu unwune. Te emerwushikwa onwongu l'ẹhu pẹ.

Unwanyi, ji pẹ anọedu

³ Kwabejekwa unwanyi, ji pẹ anọedu ùbvù; mbụ ndu ọphu adudu g'ọ du pẹ ililekpọo. ⁴ Teke ọ bu le nwanyi, ji iya anọedu nweru unwegirima; ọzoo unwu nwa-nwa; g'unwegirima ono nwuta l'ọo ẹphebedua evukpọadaru ọzo leta ndu unuphu pẹ ẹnya; l'o nokwa iphe, gbaru ndu ke Chileke bu ono. Oo ya bu; g'ẹphe eshi nno melataru ndu nwuru pẹ nu ree, ẹphe meru pẹ. O kwa iphe ono bu iphe, du ree l'iphu Chileke. ⁵ Oke gẹ nwanyi, ji iya anọedu; ebe ọ dudu g'ọ du iya ililekpọo; ọphu ọ to dudu onye eleta iya ẹnya; bukwaru Chileke be ọo-nọdu ele ẹnya l'ẹka. G'ọ to tu-gbejekwa ẹka l'anọdu epfu anụ Chileke eswe l'enyashi. Iphe, ọonoduje epfuru Chileke bu

g'ò kwọọ ya lẹ mkpa. ⁶ Nwanyị, ji iya anọedu ọp̄hu anọdujeep̄ho eme iphe, bataru iya l'obu bẹ nwuhuakwaru anwuhu; l'ẹka ọ nọ ndzu. ⁷ Noo iphe, ii-pfuru phẹ bụ onoya; mbụ pfua ya kwata pfushiaru phẹ iya ike; k'ọp̄hu ẹphe a-nọdu eme umere, gbaru phẹ nụ. Ọo ya bụ; g'ò tọ du iphe, aa-ta phẹ uta iya. ⁸ Ọ -buru l'o nweru onye haru ndu ẹphe l'iya bụ; ọp̄hu ooletadu phẹ ẹn̄ya; kekekele ndu ọp̄hu bụ ndibe phẹ gẹdegede; onye ono bukwa iphe, oogoshi bụ lẹ ya te ekwedu kẹ Kéreshi; mbụ l'onye te ekwedu kẹ Kéreshi bẹ gbẹkwa ka iya nụ mma.

⁹ G'e te edejekwa ẹpha nwanyị, ji iya anọedu l'ẹkwo; mbụ onye ọp̄hu teke anọ-rwudu ụkporo apha ẹto lẹ mgboko; gbahaep̄ho onye bụ nwoke lanu kpoloko bẹ ọ lujeru; ¹⁰ waa nwanyị, aatụdzuru onu iya; l'oomme ree shii. G'ò bukwaru nwanyị, hefutaru unwu iya ree; buru onye akwajẹ ẹbyaa ree; buru nwanyị, gudewaa mini kwọọ ndu-nsọ ọkpa; bya aburu nwanyị, yewaru ndu eje iphe-ẹhuka ẹka; bukwarupho onye wowaru onwiya yekọta l'eme iphe-oma mgburugburu kpọo.

¹¹ Jikajekwa ede ẹpha nwanyị, ji iya anọedu, bukwa du nwepa. Noo kẹle ọobujeru teke ẹgu nwoke gutaeru phẹ phọ; ẹphe aghaarụ Kéreshi azu wata achọ g'ẹphe e-me je aluru ji ọzo. ¹² Ẹphe -mewa iya nno bukwa iya bụ lẹ Chileke a-nma phẹ ikpe l'ẹphe te emeedu iphe ono, ẹphe kweru Kéreshi ukwe ememe onoya. ¹³ Teme ọzo buru l'ẹphe a-wata eme ẹn̄yiru; tsoru ekpuphe l'ulo l'ulo edophe gwerigwerigweri; buru ọjeru-opfu, 'e kuduru iya; epfugbaa iphe, ag-

bakpodaaru phẹ l'epfupfu. ¹⁴ Nokwa g'o gude mu su gẹ nwanyi, ji iya anọedu, bukwađu nwẹpa je aluru ji ọzo; nwushia unwegirima; leta ọlo iya ẹnya. Ọo ya bu; g'onye ọhogu anyi ono te enwe iphe, ọo-huma anyi l'ẹhu gude epfubyishi anyi. ¹⁵ L'o nwekwaru ndu ọphu hawarunu Kéreshi wata etso Nsetanu. ¹⁶ Ọo ya bu; ọ -duru nwoke ọzo nwanyi kweru kẹ Kéreshi, nweru abubu, ji iya anọedu ndu; g'onye ọbu letakwa abubu iya ono ẹnya. G'onye ono ta apakwaru mkpa ẹhu nwanyi ono bya ebo Chiochi. G'ọ bukwarupho ndu ọphu ji phẹ anọedu; ẹbe ẹphe amadu g'ẹphe e-me onwophe bẹ Chiochi a-nọduje eleta ẹnya.

Ndu e meru ọgerenya Chiochi

¹⁷ Iphe, gbaru g'e meje iya bu g'a kwabeje ndu e meru ọgerenya Chiochi ubvu ọkpobe akwabe; mbukwa ndu ọphu l'ejeru Chiochi ozi ree; kelekele kẹ ndu ono, kukeberu ẹhu asa opfu Chileke asasa; ezikwa iya pho ezizi ono. ¹⁸ Noo kẹle e deru iya l'ekwo-opfu Chileke su: "Te ekechijekwa eswi ọnu me ọ -nọdu azoshiru ngu ereshi." Bya asukwapho: "Onye akanya gbaru k'anata ugwo akanya iya." ¹⁹ Ọ -buru l'o nweru onye suru l'onye e meru ọgerenya Chiochi bẹ meru ẹji; te eyekwaru onye ọbu ọnu; a -gufukwa l'a du ẹbo; ọzoo ẹto gbaa ya ekebe iphe ọbu l'o meru iya eviya. ²⁰ Ndu ọphu, bu ndu eme ẹji bẹ ii-bajeru mba l'edzudzu-ọha. Ọo ya bu gẹ ndu ọphunapho atsuhukwanu ebvu.

²¹ Mu nokwa l'iphu Chileke; me l'iphu Nnajiuphu, bu Jizosu Kéreshi yẹ l'iphu unwu-ọjozi-imigwe ono, ọ hotaru ono epfushiru ngu

iya ike sụ g'i mejekwa iphemiphe-a, mu epfuru ngu-a g'ọ ha; g'ọ tọ ụkwa ọphu ii-mephodoje. Ọphu ọ ụkwa iphe, ii-leje nemadzu ọnya l'iphe eme. ²² Rije-odakwa ọriri; ọme l'i byabẹ nemadzu ẹka l'ishi. G'ẹka ngu ta adujekwa l'iphe-ẹji, ndu ọzo eme. Dobeekwapho onwongu ọrù. ²³ Ọ tọ bukwapho mini kpoloko bu iphe, ii-nguje. Ngutajekwa mee nwanshii m'obvu ọpho ngu ono; me ọhu ba adu ike ngu onoya, bu iphe ono anọduje eme ngu tekenteke onoya.

²⁴ Ọ nweru ndu ẹjo-iphe, ọphe eme dabyiru ẹba; mbu ọ gbekwanu du g'ọ bu l'iphe-ẹji, ọphe eme be vuwaa phe ọzo eje ge Chileke nmaa phe ikpe. Ọ nwekwarupho ndu ọphu nkephe akpọadaa upfu ọme l'ọo vọ-lishihu. ²⁵ Nokwapho g'eme ree du. Ọ nweru ree, nemadzu e-me l'ọ buru ree, a tukoru ele l'ọnya. Teke ọ bu l'ọ nweru ree, e meru; ọphu a humaduru iya nta; a -nonyakwaapho be ọo-tukokwaa vọ-lishihukota.

6

Ndu bu ohu

¹ G'iphe, bu ndu bu ohu guje nnajiuphu, nwe phe nu le ndu gbaru g'a kwabeje phe ubvu; k'ophu e tee wotadu ọpha Chileke yee iphe ono, anyi ezi ono epfubyishi epfubyishi. ² G'ohu, ndu ọphu nnajiuphu phe bu ke Kereshi; te ekojekwa phe okpa l'ishi; kele ọphe bu unwunna. G'ephe gbejchikwa kabakpoo phe ro ejeshiru ozi ike; eshinu onye ono, nweru ohu ono kweru ke Kereshi; buru onye du Chileke l'obu ọme ọ nodu

anọduje emeru ohu iya ree gude ebu iya nggo ozi ono, oojeshiru iya ike ono.

Noo iphe, ì-nọduje ezi ezizi; anma ọkwa iya anmashia iya ike.

Ejo nzi waa ọkpobe ẹku

³ Sù-a; teke ọ bụ l'o nweru onye ọzo, byaru awata ezi iphe, gbaru iche; ọphu iphe, oozi adagbaduru l'ọkpobe-opfu ono, bụ opfu kẹ Nnajiuphu anyi, bụ Jizosu Kéreshi ono; onye ọbu jikafua iphe ono, anyi ziru lẹ kẹ g'ee-shije etso Chileke ono; ⁴ onye ono ekukwa onwiya ekuku l'ẹbe adu iphe, ọ maru. Iphe, yele onye ono eme bukwa ntumego; yee abaphe mba l'opfu, enwedu ishi; opfu buepho eme ge nemadzu nwejeru nwibe iya enya-pfurupfuru; adzo-phe enya; epfubyishi nwibe phe; yee anodu elephe nwibe phe ejo enya; ⁵ me aloru opfu chie le mgbaka nwibe phe. Ndu ono bu ndu egomunggo phe dahwaru adzulakpa; bya abukwarupho ndu ta amadu ọkpobe-opfu ono. Epe anoduje arị l'anuru Chileke opfu bu uzo, epe e-shi rita urwu. Kpajeru egube ndu ono l'aphara.

⁶ Obenu l'anuru Chileke opfu; yele iphe-ephuru-l'enya bukwa urwu, paru eka apaa. ⁷ L'o to dukwa iphe, anyi gude bya mgboko-a; nokwapho g'o to dudu iphe, anyi e-gude eshi le mgboko ala. ⁸ Oo ya bu; anyi -nwewaru nri bya enweru uwe; g'ono phujeru anyi l'enya. ⁹ Obenu le ndu anoduje achọ g'ee-shi g'ephe kpaa ẹku be ejo-iphe ono, epe anoduje achọ ono enwujeru ye l'eme iphe-ẹji. O buru iphe ono abujeru onya nmata phe. Ikpoto iphe, agu phe nu

tukokpoerupho buru iphe-mmanu; teme o buru iya ahuje phe onu l'oku; teme o nodu alotaje phe lo-mia l'eka epe a-nodu mebyishihu; lakota l'iswi. ¹⁰ O kwa eye enya l'okpoga bu ogbarabvu iphemiphe, bu ejo-iphe. O yekwaru ndu bu opfu l'oo l'ephe achọ okpoga be o gude epe shiswee uzo; paru ekwekwe, epe kweru ke Kereshi paru haa. O bukwaru iya pho meru g'o gude epe shi egube ono gude eka phe kpataru onwophe iphe-ehuka, du igwerigwe.

Iphe Timoti e-meje

¹¹ Ole-a; gubedua, bu onye ke Chileke-a; gbalakwaaru egube iphe ono g'o ha; kukebe ehuru buru onye pfuberekoto; akwabẹ Chileke ubvu; nweru ekweta; yee n-yemobu; me nshirima; yee eme odoo. ¹² Gude ekweta lwua ogu ono lwuta ndzu ojeje, bu iphe, e kuru ngu oku iya ono; teme i pfuru l'edzudzu oha gbua ya tororo su l'i kwewaru ke Kereshi ono. ¹³ Oo l'iphu Chileke ono, bu Chileke ophu anuje iphemiphe ndzu; waa l'iphu Kereshi ono, pfuru l'iphu Payileti gbaaru okpobe-opfu ono ekebe ono; oo l'iphu phe be mu no epfu iya epfushiru ngu iya ike su ngu: ¹⁴ gi tukojeekwapho okwa okwa-a, mu anmaru ngu g'o ha-a tsokotaje. G'o to dukwa eka ii-tsoswe iya me eka lanu; oo ya bu g'o to dukwanu eka aa-ta ngu uta jeye teke Nnajiuphu anyi, bu Jizosu Kereshi a-bya ozo. ¹⁵ O -rwuepho be Chileke e-me-a g'a humadzuru Kereshi obu; mbu onye ono, dukota ree; bya edzukota oke l'ime onwiya; buru Eze ndu eze; bya aburu Nnajiuphu ndu bu nnajiuphu.

¹⁶ Oo ya kpoloko kpèekpu bu onye ta abyadu anwuhu anwuhu. Eka o bu be iphóró, du iya nu te ekwejedu ge nemadzu zakube iya ntse. O to dukwa nemadzu igbakoroshienyi gudejewaa enya huma iya; ophu o dukwa onye byaru ahuma iya nu. G'o buru iya be ndiphe a-kwabeje ubvu; ike ono, te enwedu abvubvu ono aburu nkiya. Nokwa g'o du-o!

¹⁷ A bya le ke ndu nweru iphe le mgboko-a; karu phe g'ephe te egudejekwa iya ku onwophe; ophu ephe edobekwa obu l'iphe ono, adudu g'oo- no-beru onoya. G'ephe dobechia obu phe le Chileke ono, bu omeluko onoya. Chileke ono anukotaje anyi iphemiphe; nu iya anyi k'anyinyi g'oomee g'ehu tsomahu anyi. ¹⁸ Ge ndu nweru iphe meje iphe, du ree; mbu-a; g'ephe mejekpo iphe, du ree tekenteke; g'ephe buru omeluko; l'o guje phe egu g'ephe le ndu ozo gbaru mgba l'iphe phe. ¹⁹ Oo ephe -nodu eme nno l'o buru iya bu l'ephe nweru okpobe iphe. Noo l'ephe e-shi egube ono kpata okpobe iphe kuberu onwophe; mbu okpobe iphe ophu a-noduwaru phe ro jeyewaruro l'uzo iphu. Oo ya bu; o -rwuepho; g'ephe anata ndzu ono, bu okpobe ndzu ono.

²⁰ Su-a; jiko Timoti; kwabeekwarupho iphe ono, e yeru ngu l'eka ono enya. G'i letaje enya gi ti nodu epfuphe mkpokoro opfu, bu iphe eswe; ophu i nodukwa atu-phe mkpokoro ego, ndiphe ahajeru su l'o bu mmamiphe. ²¹ O nweru ndu anoduje ari l'ephe maru iphe; ephe egude nno phua uzo ekwekwe ono, anyi kweru ono. Ge Chileke meeru unu eze-iphe-oma. Nokwa g'o du.

Bayiburu Izii
Izii: Bayiburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

c6885c7c-c550-5b8b-a4fe-4bd714af4f6d